

## Schee wars uff de Fassenacht

Vor e paar Daach iss die Fraa vom Oikaafe hoomkumme unn hott merr verzählt, dass se ess Kättche unn die Paula getroffe hädd unn dass allminonner iwwer die Fassenacht geschwätzt hädde.

Ess Kättche hädt die Paula gefroocht: Waaßde noch, wie merr om Fassenachtsdiensdaach immer enoigehippt sinn?

Die Paula hott genickt. Nodierlich waaß ich dess noch, Kättche, awwer dess iss schunn mindestens fünfunnzwonsisch Johr her.

Sächts Kättche: No unn? Wars nit schee, wie merr uns in Bettzisch gesteckt hawwe? – grad de Kopp, die Ärm unn die Schuh hawwe erausgeguckt. Odder wie merr ahle Grossjer gemacht hawwe, mettem Kapottsche, emm Schal, emm Pelerinsche unnem lange Rock, war dess nit schee?

Die Paula druff: Schee wars. Unn Larve hawwe merr uffgesetzt unn sinn mett so emm Klübsche dorsch Flerschem gezoowe.

Moi Fraa hott gesacht: Unn ihr habt eich immer bei meine Schwiecherleit, beim Honnes unn de Anna, getroffe, dort habbderr erst emol ooner getrunke unn dann seider los, de alt Honnes vorneweck unn die gonz Bloos hinnerher. Ich habb doo nie mettgemacht, ich habb dess von dehoom joo nit gekennt

Dess Kättche hadd richdisch glänzende Aache gehabbt. De erst sinn merr zum Wittekind, doo hotts immer Worscht zum Sattesse gewwe, no ja, nodierlich aach Brot unn aach genuch ze drinke, awwer konnsde dich noch erinnern, Paula? Mir musde immer so lache, weil de alt Wittekind unn später aach die junge immer gesaat hawwe: Kinner esst Worscht, Brot misse merr kaafe!

Die Paula hott gegrinst. Unn dann sinn merr weider, mir hadde joo immer unser Tuur gehabt unn sinn bei Leit, die schunn uff uns gewart hawwe unn dene ihr Hausdier de gonze Daach uffgestonne hott. Bei dene hawwe merr unser Larve abgesetzt, doo konnte merr ordentlich ooner trinke unn aach Kreppel odder Worschtebrot esse.

Ess Kättche dann: Mir sinn noochenonner in enn gonze Haufe Heiser von Bekonnte gonge, weil merr joo ersdens Dorscht hadde unn zweidens von der gonz Trinkerei immer widder pinkele mussde. Erst später, alses dunkel worm iss, sinn merr in die Wertschaffe, mir Weiwer hawwe uns uff die Männer gesterzt unn hawwese abgeknutscht, awwer dort hawwe merr unser Larve uffgelosse unn hawwe mettem Strohhalm getrunke. Zum Schluss sinn merr all nochemol zum Honnes unn de Anna, hawwe uns dort e bissi frisch gemacht, unn weil die Paula und ich noch nit genuch hadde sinn mir zwaa dann uff de Maskeball gonge, die erst Zeit in de Schitzhof unn später dann ins Galluszentrum.

Moi Fraa hott zugestimmt: Ja, doo sinn mir dann aach mettgonde, moin Monn unn ich. Zuletzt hotts Kättche noch gesaat: Was sinn merr gehippt! Wenn ich monchmol moi ahle Knoche nit beweeche kann denk ich droo, dass ich frieher so hippe konnt wie die Mädchen heit bei de Fassenachtssitzunge.

Moont die Paula: Ja, schee wars uff de Fassenacht. Heit dun merr on de dolle Daache nor noch Fassenachtszuch gucke, sunndaachs unn diensdaachs in Flerschem unn mondaachs im Fernseh, awwer ess iss gut, dass merr sich onn monches noch erinnern kann.

Eiern Honnes (de junge vom alde).